



Här Fernand Etgen
President vun der Chamber

Lëtzebuerg, den 27. Abrëll 2023

Här President,

Esou wéi den Artikel 80 vum Chambersreglement et virgesäit, bieden ech Iech, dës parlamentaresch Fro un d'Madamm Justizministesch weiderzeleeden.

Aus dem Debat zur Petitioun N° 2129 de 16. Mee 2022 zur Iwwerschaffung, Ännerung an Upassung vum Sexualstroferecht zu Lëtzebuerg ass ervirgaangen, dass dëse Sujet nach ëmmer ee gewëssenen Tabu zu Lëtzebuerg duerstellt, mat deem et ze brieche gëllt. Mat der aktueller Unzuel un Ulaflaze fir d'Affer vu sexuellem Mëssbrauch, an der héijer Donkelziffer, riskéieren déi aktuell Statistiken net fiabel ze sinn. Et ass festgehale ginn, dass verschidde Punkten aus dem Debat an d'parlamentaresch Aarbecht vun der Chamber, souwéi de Projet de loi N° 7949, erafléisse sollen.

D'Madamm Justizministesch huet an Aussicht gestallt, dass een interministeriellen Aarbechtsgrupp domat beoptraagt géif ee Froebou auszeschaffen, fir eng Bestandsopnam vun der bestoender Offer an der Noutwendegkeet vun enger zentraliséierter, nationaler Ulaflaz fir Affer vu sexuellem Mëssbrauch, ze erstellen. Dëse Questionnaire sollt dann un déi concernéiert Acteuren an Organisatioune geschéckt ginn. An där Reunioun ass och festgehale ginn, dass schonns am Hierscht 2022, hätt sollen eng Evaluatioun vun deem besote Questionnaire an deene jeeeweilege Kommissiounen stattfannen.

Doriwwer eraus, huet d'CSV am Juni 2021, eng Motioun zu enger zentraliséierter, nationaler Ulaflaz, fir dass all Affer sech op enger Plaz mellen kéint, an der Chamber deposéiert. D'Iddi dobäi war et, déi ënnerschiddlech Zuelen a Statistiken déi existéieren ze harmoniséieren, Preventiounsprogramme fir ënnerschiddlech Strukturen ze entwéckelen, Weiderbildung vum Personal an den entspreechenden Ariichtungen ze promovéieren an d'Affer bei der Sich no Therapieplazen ze ënnerstëtzen.

An deem Kontext wéilt ech folgend Froen un d'Madamm Justizministesch stellen:

- Ass dee vun der Madamm Ministesch an Aussicht gestallte Questionnaire un d'Acteure vum Terrain geschéckt ginn?
 - Wa jo, wat sinn d'Conclusiounen vun dëser Ëmfro?
 - Wa nee, firwat?
- Wat ass d'Positioun vun der Regierung zu enger zentraliséierter, nationaler Ulaftstell fir Affer vu sexuellem Mëssbrauch?

Här President, ech bieden Iech des Froen, mat mengem déifste Respekt unzehuelen.



Nancy Arendt ép. Kemp
Deputéiert